

CONSELLERÍA DO MEDIO RURAL

Corrección de erros.-Orde do 17 de agosto de 2007 pola que se establecen as bases reguladoras das axudas para a promoción, modernización e dimensionamento do asociacionismo agrario en Galicia e se convocan axudas para o ano 2007.

Advertidos erros na orde publicada no *Diario Oficial de Galicia* nº 164, do venres, 24 de agosto de 2007, cómpre facer as seguintes correccións:

Na páxina 14.253, no artigo 44º.2.b) onde di: «Regulamento (CE) 1628/2006, da Comisión, do 24 de outubro, relativo á aplicación dos artigos 87 e 88 do tratado ás axudas rexionais ao investimento, para os investimentos referentes ás empresas pertencentes á categoría de PEME, e para as actuacións dirixidas á dotación das estruturas necesarias para a comercialización de insumos aos seus socios», debe dicir: «Regulamento (CE) 70/2001, da Comisión, do 12 de xaneiro de 2001, relativo á aplicación dos artigos 87 e 88 do Tratado CE ás axudas estatais ás pequenas e medianas empresas, para os investimentos referentes ás empresas pertencentes á categoría de PEME, nas actuacións dirixidas á dotación das estruturas necesarias para a comercialización de insumos necesarios para o normal desenvolvemento da actividade nas explotacións agrarias, e coa finalidade de mellorar globalmente a prestación de servizos e a eficiencia dos procesos produtivos nas explotacións dos socios».

CONSELLERÍA DE SANIDADE

Orde do 8 de novembro de 2007 pola que se regula o procedemento de integración do persoal da Fundación Pública de Urgencias Sanitarias de Galicia-061.

A Lei 14/2004, do 29 de decembro, de medidas tributarias e réxime administrativo, engadiulle á Lei 7/2003, do 9 de decembro, de ordenación sanitaria de Galicia, unha disposición adicional cuarta a teor da cal se autorizaba o Consello da Xunta a adotar as medidas tendentes á progresiva integración no réxime estatutario do persoal das fundacións públicas sanitarias constituídas pola comunidade autónoma e das sociedades públicas autonómicas do sector sanitario. Tal disposición ten por finalidade acadar a identidade de condicións de traballo dos profesionais do sistema sanitario público de Galicia, sen prexuízo do carácter da institución en que prestan os seus servizos, en canto que integrada na rede asistencial da Consellería de Sanidade.

Logo da negociación no seo da Mesa Sectorial, o Decreto 91/2007, do 26 de abril, de integración no réxime estatutario do persoal laboral do sector sanitario público xestionado por entidades adscritas á Consellería de Sanidade, estableceu as bases ás cales se

suxeitarían os procedementos de integración voluntaria do persoal fixo das entidades afectas polo ámbito de aplicación e estableceu os efectos da citada integración. Tal decreto non é senón trasunto do principio de homologación das condicións de traballo recollido na disposición adicional 5ª da Lei 55/2003, do 16 de decembro, do estatuto marco do persoal estatutario dos servizos de saúde e da devandita disposición adicional cuarta da Lei 7/2003, do 9 de decembro, para a eficiencia do sistema sanitario público.

O artigo 3º do Decreto 91/2007, do 26 de abril, determina que os procesos de integración se articularán por orde da Consellería de Sanidade, na cal se recollerán as previsións necesarias para a súa adecuación ás bases do réxime estatutario en termos de homoxeneidade co citado réxime.

No marco destes antecedentes, esta orde regula a convocatoria do procedemento de integración no réxime estatutario para o persoal laboral da *Fundación Pública Urgencias Sanitarias de Galicia-061*, inspirado nos principios de voluntariedade para o persoal fixo, homologación e homoxeneidade das condicións coas do persoal estatutario do Servizo Galego de Saúde e universalidade.

Esta orde foi obxecto de negociación co comité de empresa da *Fundación Pública Urgencias Sanitarias de Galicia-061*, e posterior tratamento no seo da Mesa Sectorial.

Por todo iso, en virtude das competencias conferidas pola Lei de Galicia 1/1983, do 22 de febreiro, reguladora da Xunta e da súa Presidencia, modificada pola Lei de Galicia 11/1988, do 20 de outubro, e polo Decreto 91/2007, do 26 de abril, de integración no réxime estatutario do persoal laboral do sector sanitario público xestionado por entidades adscritas á Consellería de Sanidade.

DISPOÑO:

Artigo 1º.-O persoal laboral da *Fundación Pública de Urgencias Sanitarias de Galicia-061* poderá integrarse no réxime estatutario do persoal estatutario do Servizo Galego de Saúde recollido na Lei 55/2003, do 16 de decembro, do estatuto marco do persoal estatutario dos servizos de saúde, e demais normas de concordante aplicación no ámbito do Servizo Galego de Saúde, nos termos establecidos nesta orde, sempre que cumpra os seguintes requisitos:

a) Ter vínculo laboral fixo coa institución, suxeito ao convenio colectivo para o persoal laboral do sector sanitario de Galicia, xestionado por fundacións públicas sanitarias e empresas públicas, de conformidade co artigo 2.1º do Decreto 91/2007, do 26 de abril.

b) Estar en posesión da titulación exixida pola normativa estatutaria para o acceso á categoría básica de homologación.

c) Estar en situación de activo que non implique a suspensión do contrato de traballo ou en situación de suspensión do contrato de traballo por algunha das

causas establecidas pola lexislación vixente ou polo convenio colectivo de aplicación, sempre que o interesado mantivese o dereito a solicitar o reingreso ou reincorporación á institución e non tivese transcorrido o tempo máximo da citada suspensión previsto en cada caso.

As solicitudes de integración do persoal que non cumprise os devanditos requisitos serán desestimadas.

Artigo 2º.-Non poderá exercer o dereito de opción á integración a que se refire esta orde:

a) O persoal vinculado mediante contrato de alta dirección.

b) O persoal excluído do ámbito de aplicación do convenio colectivo para o persoal laboral do sector sanitario de Galicia, xestionado por fundacións públicas sanitarias e empresas públicas.

c) O persoal laboral temporal, que estará suxeito ao establecido na disposición adicional segunda desta orde.

Artigo 3º.-O persoal cuxa opción fose estimada, consonte o establecido nesta orde e no Decreto 91/2007, do 26 de abril, quedará suxeito ao réxime xurídico e retributivo estatutario aplicable ao persoal estatutario do Servizo Galego de Saúde, sen prexuízo das peculiaridades derivadas do funcionamento da institución de destino.

O persoal integrado dependerá organizativa e funcionalmente da institución de destino, de conformidade co establecido no Decreto 91/2007, en función do vínculo orixinario coa devandita institución e a causa que o motivou.

A integración producirá a renovación da relación de servizos do persoal coa institución e a súa suxeición ao réxime estatutario, sen que en ningún caso orixine dereito a indemnización.

Artigo 4º.-A resolución pola cal se declare a integración determinará a categoría básica estatutaria en que se produce a esta, segundo a táboa de homologación prevista no Decreto 91/2007, do 26 de abril, atendendo á categoría de pertenza como persoal laboral fixo da institución segundo se deduza do contrato de traballo, o nivel de titulación exixido no proceso selectivo en virtude do cal se accedeu á condición de persoal fixo ou indefinido e/ou as funcións correspondentes; todo iso sen prexuízo do previsto no parágrafo 5 do artigo 6 do Decreto 91/2007, do 26 de abril, en relación coas situacións de promoción interna temporal.

De conformidade co establecido no parágrafo terceiro do artigo 6 do Decreto 91/2007, do 26 de abril, para os efectos da integración nas categorías do réxime estatutario só terá virtualidade a categoría á cal o persoal acredite pertencer con carácter de fixeza, en virtude de proceso selectivo realizado consonte a normativa vixente no momento da súa adquisición.

Coa resolución de integración a xerencia expedirá o nomeamento estatutario no cal se detallará a categoría e destino dos profesionais, co carácter de definitivo ou provisional, segundo corresponda.

No caso de que o persoal integrado estivese desempeñando postos de traballo que supoñan exercicio de funcións de dirección, xefatura, coordinación ou singular responsabilidade, a Xerencia expedirá un nomeamento estatutario adicional de carácter provisorio, consonte o establecido no anexo I desta orde, cuxo réxime quedará suxeito ao establecido no Decreto 206/2005, do 22 de xullo, e na Orde do 24 de xullo de 2006 para os postos de similares características no ámbito do Servizo Galego de Saúde.

Naqueles supostos en que o persoal que optase pola integración estivese desempeñando con carácter provisional postos de superior categoría ou dunha categoría cuxa posesión non acreditasen consonte os criterios establecidos no parágrafo 5 do artigo 6 do Decreto 91/2007, a Xerencia expedirá resolución adicional na cal se declare en situación de promoción interna temporal na categoría estatutaria de promoción con referencia da causa que deu lugar á devandita promoción.

A resolución de integración do persoal laboral fixo que non estivese prestando servizos na institución á cal a une tal vínculo de fixeza, pero que teña o dereito de retorno ou reingreso á devandita institución, determinará o pase á situación administrativa que corresponda de conformidade co previsto na Lei 55/2003, do 16 de decembro, en función da causa que orixinou a suspensión do contrato de traballo, sen prexuízo do disposto na disposición adicional cuarta.

Sen prexuízo do disposto no artigo 7.4º do Decreto 91/2007, do 26 de abril, a integración do persoal suporá o recoñecemento expreso da antigüidade para os efectos do seu devengo como persoal estatutario, desde a data da súa integración.

Artigo 5º.-O persoal que non resulte integrado no réxime estatutario manterá o réxime xurídico e retributivo que derive do seu contrato de traballo e o convenio colectivo de aplicación, no momento da entrada en vigor desta orde.

Artigo 6º.-As solicitudes de integración presentaranse no prazo de tres meses contados desde o día seguinte ao da publicación desta orde no *Diario Oficial de Galicia*, segundo o modelo de instancia que se xunta no anexo III.

As solicitudes dirixiranse ao director xeral da División de Recursos Humanos e Desenvolvemento Profesional do Servizo Galego de Saúde e poderán ser presentadas en calquera das formas establecidas na Lei 30/1992, do 26 de novembro, de réxime xurídico das administracións públicas e do procedemento administrativo común.

As solicitudes deberán ser debidamente dilixenciadas pola dirección dos centros e con ela achegarase a seguinte documentación, debidamente cotexada:

- a) Copia do DNI.
- b) Copia do contrato de traballo que acredite a condición de persoal fixo ou indefinido.
- c) Copia do título exixible para o desempeño da categoría.
- d) Certificado de servizos prestados ou documentación que acredite a antigüidade da persoa interesada e anexo II do Real decreto 1181/1989, do 29 de setembro.
- e) Copia da resolución pola que se estime a suspensión do contrato de traballo e se determine a súa causa, de ser o caso.
- f) No caso do persoal que exerza funcións ou desempeño de postos de xefatura, coordinación ou especial responsabilidade, achegarase copia da designación realizada pola xerencia.

Examinadas as solicitudes, a División de Recursos Humanos e Desenvolvemento Profesional poderalle solicitar documentación complementaria ao interesado ou á dirección do centro que se entenda relevante para dilucidar as circunstancias laborais do alcance da integración.

O persoal que non formule a solicitude de integración nos termos previstos nesta orde entenderase que opta por permanecer na situación prevista no artigo 9 do Decreto 91/2007, do 26 de abril.

Artigo 7º.-As solicitudes de integración serán resoltas no prazo dos tres meses seguintes ao remate do prazo para a presentación daquelas.

A resolución pronunciarase sobre a estimación, desestimación ou inadmisión das solicitudes. As resolucións polas que se desestime ou non se admita unha solicitude serán debidamente motivadas.

As resolucións estimatorias conterán pronunciamiento sobre a categoría básica na cal se integran as persoas interesadas, o carácter do destino, a situación administrativa que corresponda declarar, segundo o caso, e a súa adscripción ao posto de traballo de conformidade co disposto nesta orde e o seu anexo I.

As resolucións polas que se resolvan as solicitudes de integración no réxime estatutario terán efectos do 1 de xullo de 2007.

Artigo 8º.-O persoal facultativo poderá exercer a opción polo réxime de dedicación normal ou exclusiva, coa conseguinte solicitude ou renuncia á percepción do complemento específico, segundo o caso, de conformidade co previsto no Decreto 11/1995, do 20 de xaneiro, polo que se regula o réxime de percepción do complemento específico para o persoal estatutario do Servizo Galego de Saúde e se establecen os prazos para formular solicitudes e renuncias.

Disposicións adicionais

Primeira.-Os postos de traballo do persoal que resulte integrado consideraranse amortizados e reconvertidos en postos de réxime estatutario, consonte a táboa de homologacións prevista no anexo I desta orde.

No momento en que se produza vacante nun posto cuxa titularidade corresponda a persoal laboral que non se integre e non teña dereito de reserva sobre ela, producirase a súa amortización.

Segunda.-Agás o establecido na disposición transitoria, os postos de traballo desempeñados por persoal laboral temporal amortizaranse e o persoal cesará por tal motivo con efectos da data da amortización.

Sempre que sexa necesario o seu mantemento, transformaranse, sen solución de continuidade, en postos do réxime estatutario da respectiva categoría, segundo as táboas de homologación do anexo I, e o persoal que anteriormente os viña desempeñando e que reunise os requisitos de titulación será vinculado mediante nomeamento estatutario de equivalente causa a aquela que constase no contrato de traballo inicial e co mesmo carácter temporal, con efectos do día seguinte ao do cesamento.

O persoal laboral temporal que non dispoña da titulación exixible para o desempeño da praza da categoría estatutaria de correspondencia non poderá ser obxecto de integración no réxime estatutario. Os postos de traballo desempeñados polo citado persoal serán obxecto de cobertura definitiva por persoal fixo laboral ou estatutario, segundo a opción do titular e/ou a convocatoria que se realizase para a súa cobertura definitiva. A incorporación do persoal fixo ocasionará o seu cesamento.

O persoal temporal que estivese a desempeñar un posto de traballo en condición de substituto de persoal laboral fixo manterá a súa vinculación con tal causa até a reincorporación do titular ou a extinción do dereito de reserva do dito posto. A vinculación do citado persoal manterase no réxime laboral ou pasará a réxime estatutario en función do réxime do posto desempeñado e, xa que logo, do exercicio do dereito de opción polo seu titular. Producida a extinción do dereito de reserva do traballador substituído que non optase por integrarse, o persoal substituto cesará na súa prestación de servizos e a praza amortizarase podendo transformarse en praza de réxime estatutario, de ser o caso. A cobertura da citada praza realizarase polo procedemento regulamentariamente establecido para as vinculacións temporais de réxime estatutario.

Terceira.-Sen prexuízo do establecido no artigo 2 desta orde, o persoal laboral fixo que no momento en que se publique esta orde reúna os requisitos para a homologación da súa titulación profesional, de conformidade coa normativa de ordenación das titulacións oficiais e das profesións, poderá exercer a súa opción de integración quedando a súa resolución en

suspense até que se acredite a citada homologación, mediante resolución oficial ditada por órgano competente.

Acreditada a homologación profesional polo interesado, producirase a integración na categoría estatutaria que corresponda, con efectos da data da acreditación.

O prazo para que o traballador achegue a resolución de homologación profesional non poderá exceder dun mes desde a súa notificación. De non presentar a acreditación neste prazo, entenderase caducada a súa solicitude e a dita acreditación carecerá de efectos co fin de estimar a súa opción de integración.

Cuarta. Como consecuencia da resolución de integración:

a) Ningún profesional poderá ter simultaneamente a condición de persoal estatutario fixo e temporal nunha mesma categoría.

b) Ningún profesional poderá simultaneamente acreditar a condición de persoal estatutario en activo e en situación distinta á de activo nunha mesma categoría.

c) Ningún profesional poderá simultaneamente ter dereito de reingreso en máis dunha institución do ámbito institucional definido no Decreto 91/2007, do 26 de abril, ou das institucións sanitarias do Servizo Galego de Saúde.

Xa que logo, tidas en conta as circunstancias da mobilidade dos profesionais entre as institucións sanitarias públicas da Comunidade Autónoma de Galicia, as cuestións que se susciten derivadas da concorrencia dunha pluralidade de vínculos nunha mesma categoría coas institucións do ámbito de aplicación do Decreto 91/2007, do 26 de abril, ou coas institucións sanitarias do Servizo Galego de Saúde, por mor da tramitación das solicitudes de integración do persoal, resolveranse consonte os criterios seguintes:

a) Persoal fixo con praza en propiedade, nunha mesma categoría ou categoría equiparable para os efectos da integración, en dúas ou máis institucións do ámbito referido no parágrafo anterior:

I. O persoal que teña dereito de reserva de praza nunha institución e estea en activo nunha praza en propiedade doutra institución deberá optar por reincorporarse á anterior ou permanecer na actual, perdendo calquera dereito sobre aquela pola que non optase.

II. Se, tendo un dereito de reingreso, o persoal que opte pola integración estivese en activo noutra institución e acredítase a propiedade sobre praza desta última, entenderase vinculado definitivamente a ela, perdendo aquel dereito de reingreso, agás que, cumprindo cos requisitos exixidos para o reingreso, xunto coa solicitude de integración instase este e a xerencia resolverse favorablemente con anterioridade á finalización do prazo para a resolución da integración. Nes-

te suposto, a toma de posesión en virtude do reingreso suporá a perda do destino no posto de traballo que viñese desempeñando con anterioridade.

b) Persoal fixo nunha institución do referido ámbito que estivese a desempeñar servizos de carácter temporal noutra institución na mesma categoría ou categoría equiparable:

I. O persoal que teña dereito de reserva de praza nunha institución e estea en activo como persoal temporal noutra institución integrarase no réxime estatutario na categoría que corresponda, permanecendo na institución do seu actual destino en comisión de servizos, logo do informe favorable da dirección da institución en que teña reservada a súa praza. De non se autorizar esta, o persoal deberá reincorporarse á súa praza en propiedade ou renunciar á estatutarización. De non realizar ningunha das dúas opcións, entenderase que renuncia ao dereito á estatutarización.

II. O persoal que, tendo un dereito de reingreso nunha institución, estivese prestando servizos como persoal temporal noutra institución na mesma categoría, sempre e cando reúna os requisitos para solicitar o reingreso, será declarado en situación de reingreso provisorio xunto coa resolución de integración, coas consecuencias inherentes á dita condición.

Quinta.-A institución obxecto do ámbito de aplicación desta orde suxeitarase ás normas xerais de coordinación que se diten en materia de xestión de persoal e ordenación dos cadros de persoal que se consideren necesarias para o establecemento de criterios homoxéneos de actuación en materia de persoal.

Sexta.-Habilítase o director da *Fundación Pública de Urxencias Sanitarias de Galicia-061* para a realización de todos os actos de xestión ordinaria do persoal estatutario que traballe na institución.

Sétima.

1. Créanse os seguintes postos de traballo de persoal estatutario:

-Pertencentes á categoría médico/a coordinador/a: xefe/a de sala e médico/a coordinador/a do 061.

-Pertencentes á categoría médico/a asistencial: xefe/a de base dobre, xefe/a de base simple, médico/a asistencial de base dobre e médico/a asistencial de base simple.

-Pertencentes á categoría ATS/DUE: ATS/DUE de base simple, ATS/DUE de base dobre.

2. En cumprimento do establecido na disposición adicional sétima do Decreto 91/2007, do 26 de abril, o persoal que se integre nos postos de traballo das categorías de persoal estatutario médico/a coordinador/a do 061 e médico/a asistencial do 061 será retribuído consonte a estrutura retributiva recollida para os citados postos no anexo II desta orde.

O persoal das devanditas categorías percibirá un complemento de produtividade variable en atención ao grao de cumprimento dos obxectivos determinados

pola dirección. Para os efectos do seu aboamento neste exercicio e sucesivos, tras a integración, da masa salarial autorizada para o ano 2007 para a remuneración do complemento de produtividade variable do persoal das categorías laborais médico/a coordinador/a e médico/a asistencial, destinarase unha contía estritamente proporcional ao número de profesionais pertencentes a ela que resulten integrados nas categorías estatutarias médico/a coordinador/a do 061 e médico/a asistencial do 061.

3. O persoal que se integre na categoría de persoal estatutario ATS/DUE que desempeñe os postos de traballo a que se refire o parágrafo primeiro desta disposición será retribuído consonte a estrutura retributiva recollida para eles no anexo II desta orde.

4. Sen prexuízo da estrutura retributiva dos postos de traballo recollida nesta orde, o persoal das devanditas categorías percibirá o complemento de atención continuada que corresponda, de conformidade coa normativa vixente para o persoal estatutario.

Oitava.-Desta orde darase conta ao Padroado da *Fundación Pública de Urxencias Sanitarias de Galicia-061*.

Disposición transitoria

Se no momento da entrada en vigor desta orde se estivese tramitando algún proceso selectivo, convocado con anterioridade á dita data, que estea pendente de resolución, os aspirantes que superasen o proceso poderán exercer a súa opción de integración no prazo para a toma de posesión do posto adjudicado.

O exercicio da opción polo interesado comportará a transformación do posto de traballo en praza do réxime estatutario.

Disposición derradeira

Esta orde entrará en vigor o día seguinte ao da súa publicación no *Diario Oficial de Galicia*.

Santiago de Compostela, 8 de novembro de 2007.

M^a José Rubio Vidal
Conselleira de Sanidade

ANEXO I

Posto de traballo que se integra	Posto de traballo ao cal se homologa
Médico/a coordinador/a de calidade (G-1-16)	Xefe/a de servizo (SF-A-04, SF-A-05)
Médico/a asistencial xefe/a de base (G-1-17)	Médico/a asistencial do 061 xefe/a de base simple
	Médico/a asistencial do 061 xefe/a de base dobre
Médico/a asistencial (G-1-18)	Médico/a asistencial do 061 base simple
	Médico/a asistencial do 061 base dobre
Médico/a coordinador xefe/a de sala (G-1-19)	Médico/a coordinador/a do 061 xefe/a de sala
Médico/a coordinador/a (G-1-20)	Médico/a coordinador/a do 061
Coordinador/a docente (G-1-21)	Xefe/a de servizo (SF-A-04, SF-A-05)
Coordinador/a de servizo at. usuario (G-1-24)	Xefe/a de servizo (SF-A-04, SF-A-05)
Coordinador/a servizo xestión de información asistencial (G-1-25)	Xefe/a de servizo (SF-A-04, SF-A-05)
Técnico/a de xestión (titulado/a superior) (G-3-10)	Técnico/a da función administrativa/técnico superior (N-A-05)
	Técnico/a superior en sistemas e tecnoloxías da información (N-A-08)
Técnico/a de xestión responsable de área (G-3-08)	Xefe/a de servizo grupo técnico (N-A-01)
ATS/DUE (G-4-02)	ATS/DUE de base simple
	ATS/DUE de base dobre
Técnico/a medio responsable de RR.HH. (G-5-05)	Xefe/a de servizo-grupo de xestión (N-B-01)
Técnico/a de xestión (titulado/a medio) (G-5-05)	Grupo de xestión da función administrativa (N-B-09)
Oficial administrativo/a formador/a (G-7-03)	Xefe/a de grupo administrativo (N-C-03)
Oficial administrativo/a responsable de área (G-7-08)	Xefe/a de grupo administrativo (N-C-03)
Oficial administrativo/a responsable de facturación (G-7-09)	Xefe/a de equipo administrativo (N-C-06)
Oficial administrativo/a (G-7-04)	Administrativo/a da función administrativa (N-C-05)

ANEXO II

Cadro de retribucións do persoal da *Fundación Pública de Urxencias Sanitarias de Galicia-061*

Posto de traballo	Grupo	Nivel	Soldo base	Destino	Específico	Produtividade
Xefe/a de base simple	A	26	1.112,85	603,66	1.526,80	273,69
Xefe/a de base dobre	A	26	1.112,85	603,66	1.824,30	273,69
Médico/a asistencial de base simple 061	A	24	1.112,85	504,00	1.134,31	273,69
Médico/a asistencial de base dobre 061	A	24	1.112,85	504,00	1.431,81	273,69
Xefe/a de sala	A	26	1.112,85	603,66	2.028,29	273,69
Médico/a coordinador/a 061	A	26	1.112,85	603,66	1.364,72	273,69
ATS/DUE de base simple 061	B	21	944,48	409,25	259,30	193,44
ATS/DUE de base dobre 061	B	21	944,48	409,25	434,87	193,44

Relación de documentos que achegan coa solicitude, que deberá estar debidamente compulsada (disposición 6, parágrafo 3º):

- Fotocopia compulsada do DNI ou do pasaporte ou documento que acredite a identidade, nacionalidade e data de nacemento do interesado, así como, de ser o caso, as circunstancias do dereito a que se refire a alínea a) da base segunda.
- Fotocopia do contrato de traballo que acredite a condición de persoal fixo ou indefinido.
- Fotocopia da resolución que recoñeza a situación de promoción interna temporal.
- Fotocopia do título exixible para o desempeño da categoría de pertenza.
- Fotocopia do título exixible para o desempeño de distinta categoría á de pertenza.
- Certificado de servizos prestados ou documento que acredite a antigüidade da persoa interesada e anexo II do Real decreto 1181/1989.
- Fotocopia da resolución pola cal se considere a suspensión do contrato de traballo e se determine a súa causa, de ser o caso.
- No caso do persoal que exerza funcións ou desempeño de postos de xefatura, coordinación ou especial responsabilidade achegarase copia da designación realizada pola xerencia.
- Informe sobre funcións realizadas no desempeño do posto de traballo.
- Outra documentación:

.....
.....
.....
.....

CONSELLERÍA DE PESCA E ASUNTOS MARÍTIMOS

Resolución do 7 de novembro de 2007, da Dirección Xeral de Innovación e Desenvolvemento Pesqueiro, pola que se fixan as datas para a realización dos exames ordinarios de 2008 para a obtención de titulacións para o goberno de embarcacións de lecer.

A orde da Consellería de Pesca, Marisqueo e Acuicultura do 30 de xullo de 1998 establece a normativa xeral para a realización dos exames para a obtención das titulacións para o goberno de embarcacións de lecer.

Sendo necesario establecer a data e as condicións de inscrición nas convocatorias ordinarias previstas para o 2008, esta dirección xeral, en uso do establecido na Orde do 30 de xullo de 1998 (DOG nº 158, do 17 de agosto) e de conformidade coa Orde FOM/3200/2007, do 26 de outubro (BOE nº 264, do 3 de novembro).

RESOLVE:

Primeiro.-Proceder á convocatoria dos exames teóricos ordinarios de xaneiro, abril e outubro de 2008 nas seguintes datas:

1. Patrón para a navegación básica.

-Día 16 de xaneiro, nas horas fixadas polo centro no seu taboleiro de anuncios.

O exame realizarase no Instituto Politécnico Marítimo-Pesqueiro do Atlántico de Vigo, na Escola Oficial

Náutico-Pesqueira de Ribeira e na Escola Oficial Náutico-Pesqueira de Ferrol.

-Día 15 de abril, nas horas fixadas polo centro no seu taboleiro de anuncios.

O exame realizarase no Instituto Politécnico Marítimo-Pesqueiro do Atlántico de Vigo, na Escola Oficial Náutico-Pesqueira de Ribeira e na Escola Oficial Náutico-Pesqueira de Ferrol.

-Día 15 de outubro, nas horas fixadas polo centro no seu taboleiro de anuncios.

O exame realizarase no Instituto Politécnico Marítimo-Pesqueiro do Atlántico de Vigo, na Escola Oficial Náutico-Pesqueira de Ribeira e na Escola Oficial Náutico-Pesqueira de Ferrol.

2. Patrón de embarcacións de lecer.

-Día 22 de xaneiro, nas horas fixadas polo centro no seu taboleiro de anuncios.

O exame realizarase no Instituto Politécnico Marítimo-Pesqueiro do Atlántico de Vigo, na Escola Oficial Náutico-Pesqueira de Ribeira e na Escola Oficial Náutico-Pesqueira de Ferrol.

-Día 22 de abril, nas horas fixadas polo centro no seu taboleiro de anuncios.

O exame realizarase no Instituto Politécnico Marítimo-Pesqueiro do Atlántico de Vigo, na Escola Oficial Náutico-Pesqueira de Ribeira e na Escola Oficial Náutico-Pesqueira de Ferrol.